



Fasnacht 2024

Sujet: **Fählt's dr obe, chläbsch Di an Bode**

Das Joor, mir säge das zu unserem Schutz
kümmere mir uns ume Umwälschutz
tüent uns mit so Dubeli sympathisiere
bestuune und villicht au lo inspiriere.
Drum darf me uns für euses Sujet lobe:

«Fählt's dr obe, chläbsch Di an Bode»

Berücksichtigt au eusi Sponsore, dass wär e Bitt,
es wäre Cementit, Uhu und au Pritt.
Dank dene chönne mir besser läbe
und eus sicher an Bode chläbe,
Die hebe super, dass isch bekannt,
drum händ au es paar so Bröcke an dr Hand.
Doch es isch halt scho negativ so e Brocke,
aber drfür muess dr Verchehr stocke.
Auto hinter Auto, es s'blibt alles stoh,
d'Autofahrer findes e «No Go».
Dr Eint oder Ander wird au muff,
wird hässig und regt sich uf!
Isch doch egal, wenn i z'spot zum Schaffe chumm,
wiso nimmi au de Charre bi jo dumm.
Wäri schlau, denn fahrti nämli
mitem Bus oder em Trämli,
aber nei ich Dotteli
es gubti jo no s'Velo oder s'Trotteli

Es git in Prattele en «Viel-Trotti-Benutzer»
es isch euse no Gmeindrot Darnuzer.
Gsesch ihn mit sinere orange Weschte ummeflitze
mir händ immer Angscht er chönnt uf eimol anesitze

Apropos Verchehr, do fällt mir no öpis i, nundefahne!
Letschti chläbt öbis am Charre dass ghört dört nit ane.
Denn chunnt's mir in Sinn perse,
i ha ufem Heiwäg e Klimachläber überseh.

Klimachläber Umfahre isch dr Hit,
dass dänkt sich au e Laschtwagechauffeur und macht mit.
S'Ergäbnis isch leider nit so famos
er isch si Uswiss und dr Job los.

In Prattele git's e Stroos do cha dir das nit passiere,
dört muesch mit anecläbe nit pressiere.
Es isch wenig Verchehr, mir finde das e Stuss,
denn sie striche eifach dr Friedhofbus.
Au d' Rhystroos zum Chläbe würd eus gfalle
dört tüent d' Chärre höchstens in d'Betonelement ineknalte

Au dr Minu würd gärn e Klimachläber si.
Er meint: «Hey, het's dört aber süessi Chläberli drby?
Es wär e Bericherig für mis Läbe,
würd sich so Eine uf mis Schössli chläbe.»

So als Klimachläber läbsch riskant,
dass isch jo allgemein bekannt.
Aber kennet ihr die grösschti Gfohr?
Das isch bewiese und au wohr.
Das si Näbewürkige, die si nit gsund,
weder für Mensch, Chatz oder Hund.
Inhaliersch zviel Dämpf i vo dene Chläber,
dass erkennsch guet, bim Daniel Jositsch oder Eric Wäber.
Dr Einti benimmt sich immer wieder e Mol drnäbe,
dr Ander will sich unbedingt an Bundresrot-Stuhl chläbe.

Mir müesse euch jetzt gestoh, mir händ euch betroge,
dass obe isch alles erstunke und erloge.
Die ganze Klimachläber finde mir en Saich
oder anderscht gsait: «Birrewaich»
Wenn für öpis kämpfsch, gohts immer witer,
egal ob's Wätter schön isch oder schitter.
Au jetzt im Winter wenn's chalt isch duss,
wär's Klimachläbe halt kei Gnuss.
Immer händ's die gliche Leier,
drby si viele vo dene eifach Weicheier.
Drum glaube mir, wenn dr Umzug wird stocke,
dass es keini Chläber si, wo uf dr Route hocke.
An alli Andere euse Tip, tüent's nit versueche,
dass empfehle Euch die **UNCHLÄBTE Dorfplatzrueche**.

